



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

08.09.2017թ.

Ո Ր Ո Շ ՈՒ Մ

ՀՀ գնումների բողոքարկման խորհրդի
թիվ ՍՑ-ԷՍ-2017/30

Հայաստանի Հանրապետության գնումների բողոքարկման խորհրդուրդը (այսուհետ՝ նաև Խորհուրդ)՝ ուսումնասիրելով Հայաստանի Հանրապետության ֆինանսների նախարարության կողմից 14.08.2017թ. թիվ 03/26-3/14849-17 գրությամբ «Աշոտ և Հայկ եղբայրներ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգով ներկայացված հիմքերը, պարզեց հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, Զրվեժի համայնքապետարանի (այսուհետ՝ նաև Պատվիրատու) 02.08.2017թ. թիվ 01/03.2/456-17 և 14.08.2017թ. թիվ 01/03/498-17 գրության հիման վրա, 14.08.2017թ. ՀՀ գնումների բողոքարկման խորհրդում նախաձեռնել է «Աշոտ և Հայկ եղբայրներ» ՍՊԸ-ին (այսուհետ՝ նաև Ընկերություն) գնումների գործընթացին մասնակցելու իրավունք չունեցող մասնակիցների ցուցակում (այսուհետ՝ նաև Ցուցակ) ներառելու պաշտոնական ընթացակարգ:

ՀՀ ֆինանսների նախարարությունը պատշաճ ծանուցվել է Խորհրդում անցկացվող նիստերի ժամանակացույցի վերաբերյալ, սակայն նախարարության կողմից լիազորված որևէ ներկայացուցիչ չի ներկայացել:

2. Զրվեժի համայնքապետարանի ներկայացրած փաստարկները և դիրքորոշումը.

Զրվեժի համայնքապետարանը 02.08.2017թ. թիվ 01/03.2/456-17 գրությամբ դիմել է ՀՀ ֆինանսների նախարարությանը՝ հայտնելով հետևյալը.

«Հիմք ընդունելով ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 45-րդ կետը՝ տեղեկացնում ենք, որ «ԿՄԶՀ-ԳՀԱՇՁԲ-17/3» ծածկագրով գնանշման հարցման ընթացակարգի հայր ներկայացնելու օրվա դրությամբ «Աշոտ և Հայկ եղբայրներ» ՍՊԸ-ի կողմից ներկայացված «Ֆինանսական միջոցներ» չափանիշը չի համապատասխանում հրավերի պահանջներին, քանի որ էներգետիկ բնագավառում կատարված աշխատանքների հանրագումարային ծավալը պակաս է ներկայացված գնային առաջարկի հիսուն տոկոսից»:

Պատվիրատուն 14.08.2017թ. թիվ 01/03/498-17 գրությամբ ՀՀ ֆինանսների նախարարությանն է ներկայացրել նաև պաշտոնական ընթացակարգ նախաձեռնելու համար անհրաժեշտ փաստաթղթերը:

Խորհրդում նախաձեռնված պաշտոնական ընթացակարգի քննության նպատակով տեղի ունեցած նիստերին մասնակցում էր Զրվեժի համայնքապետարանի աշխատակազմի ֆինանսական, եկամուտների հաշվառման և հավաքագրման բաժնի պետ Անահիտ Մարգարյանը:

3. «Աշոտ և Հայկ եղբայրներ» ՍՊԸ-ի ներկայացրած փաստարկները և դիրքորոշումը.

«Աշոտ և Հայկ եղբայրներ» ՍՊԸ-ն ՀՀ գնումների բողոքարկման խորհրդին 14.08.2017թ. ներկայացրել էր բողոք, որով հայտնել է հետևյալը.

««Աշոտ և Հայկ եղբայրներ» ՍՊԸ-ն «ԿՄԶՀ-ԳՀԱՇՁԲ-17/3» ծածկագրով գնանշման հարցման ընթացակարգին ճանաչվել է առաջին տեղն զբաղեցրած մասնակից և

սահմանված ժամկետում և կարգով ներկայացրել է որակավորման չափանիշները հիմնավորող՝ հրավերով նախատեսված փաստաթղթերը: «ԿՄՋՀ-ԳՀԱՇՁԲ-17/3» ծածկագրով գնանշման հարցման ընթացակարգի գնահատող հանձնաժողովի 2017 թվականի հուլիսի 26-ին ժամը 10:30-ին կայացած նիստում կայացվել է որոշում այն մասին, որ «Մասնագիտական փորձառություն», «Ֆինանսական միջոցներ» և «Աշխատանքային ռեսուրսներ» որակավորման չափանիշները հիմնավորող փաստաթղթերում առկա են անհամապատասխանություններ հրավերի պահանջների նկատմամբ:

«Աշոտ և Հայկ եղբայրներ» ՍՊԸ-ն սահմանված ժամկետում շտկել է անհամապատասխանությունները, սակայն գնահատող հանձնաժողովի 2017 թվականի հուլիսի 27-ին ժամը 16:00-ին կայացած նիստում կայացվել է որոշում «Աշոտ և Հայկ եղբայրներ» ՍՊԸ-ի հայտը մերժելու մասին»:

Ընկերությունը հորհրդին ներկայացված բողոքով հայտնել է, որ «ԿՄՋՀ-ԳՀԱՇՁԲ-17/3» ծածկագրով գնանշման հարցման ընթացակարգի հանձնաժողովը 27.07.2017թ. թիվ 3 արձանագրությամբ «Աշոտ և Հայկ եղբայրներ» ՍՊԸ-ի հայտը մերժելով՝ գործել է ոչ իրավաչափ, և խնդրել է դադարեցնել վերոհիշյալ որոշումը, ինչպես նաև «ԱՐԳՈՀՇԻՆ» ՍՊԸ-ին առաջին տեղ զբաղեցրած մասնակից ճանաչելու՝ նույն արձանագրությամբ կայացված որոշումը:

Խորհրդի նիստերին մասնակցում էին «Աշոտ և Հայկ եղբայրներ» ՍՊԸ-ի լիազորված ներկայացուցիչներ Գևորգ Պռազյանը և Պավել Գաբրիելյանը:

4. ՍՑ-ԷՍ-2017/30 պաշտոնական ընթացակարգի քննության համար էական նշանակություն ունեցող փաստերը, Խորհրդի հիմնավորումները և եզրահանգումը.

Խորհուրդն ուսումնասիրել է ՀՀ ֆինանսների նախարարության 14.08.2017թ. թիվ 03/26-3/14849-17 գրությունը, Ջրվեժի համայնքապետարանի 02.08.2017թ. թիվ 01/03.2/456-17 և 14.08.2017թ. թիվ 01/03/498-17 գրությունները, «ԿՄՋՀ-ԳՀԱՇՁԲ-17/3» ծածկագրով գնանշման հարցման հրավերը (այսուհետ՝ նաև Հրավեր), «ԿՄՋՀ-ԳՀԱՇՁԲ-17/3» ծածկագրով գնանշման հարցման հանձնաժողովի (այսուհետ՝ նաև Հանձնաժողով)

26.07.2017թ. ժամը 10:30-ին կայացած նիստի թիվ 3, 27.07.2017թ. ժամը 16:00-ին կայացած նիստի (շարունակություն) թիվ 3, արձանագրությունները, «Աշոտ և Հայկ եղբայրներ» ՍՊԸ-ի ՀՀ գնումների բողոքարկման խորհրդին 14.08.2017թ. ներկայացրած բողոքը.

Խորհուրդը՝ քննելով «Աշոտ և Հայկ եղբայրներ» ՍՊԸ-ի կողմից 14.08.2017թ. ներկայացրած բողոքը, 31.08.2017թ. թիվ ԳԲԽ-ԷՍ-2017/30 որոշմամբ «Աշոտ և Հայկ եղբայրներ» ՍՊԸ-ի կողմից 14.08.2017թ. ներկայացրած բողոքը բավարարել է մասնակի և դադարեցրել է «ԿՄՋՀ-ԳՀԱՇՁԲ-17/3» ծածկագրով գնանշման հարցման ընթացակարգի հանձնաժողովի կողմից 27.07.2017թ. թիվ 3 արձանագրությամբ «Աշոտ և Հայկ եղբայրներ» ՍՊԸ-ի հայտը մերժելու, ինչպես նաև «ԱՐԳՈՀՇԻՆ» ՍՊԸ-ին առաջին տեղ զբաղեցրած մասնակից ճանաչելու մասին որոշումները:

Թիվ ԳԲԽ-ԷՍ-2017/30 որոշմամբ արձանագրվել է հետևյալը.

«ՀՀ Կոտայքի մարզի Ջրվեժի համայնքապետարանը Ջրվեժ համայնքի 20-րդ և 28-րդ փողոցների արտաքին լուսավորության ցանցի կառուցման աշխատանքների ձեռքբերման նպատակով հայտարարել է «ԿՄՋՀ-ԳՀԱՇՁԲ-17/3» ծածկագրով գնանշման հարցում (այսուհետ՝ նաև ընթացակարգ):

Ընթացակարգին մասնակցելու նպատակով հայտ է ներկայացրել նաև «Աշոտ և Հայկ եղբայրներ» ՍՊԸ-ն:

Հանձնաժողովի 26.07.2017թ. ժամը 10:30-ին կայացած նիստի թիվ 3 արձանագրության 1-ին կետի համաձայն՝ «Աշոտ և Հայկ եղբայրներ» ՍՊԸ-ի հայտարարությունը որակվել է իրականությանը չհամապատասխանող:

Նույն արձանագրության 2-րդ կետով Հանձնաժողովը հաստատել է, որ «ԿՄՋՀ-ԳՀԱՇՁԲ-17/3» ծածկագրով գնանշման հարցման մասնակից «Աշոտ և Հայկ եղբայրներ» ՍՊԸ-ի ներկայացրած հիմնավորող փաստաթղթերը չեն համապատասխանում որակավորման պահանջներին՝ «Մասնագիտական փորձառություն», «Ֆինանսական միջոցներ» և «Աշխատանքային ռեսուրսներ» չափանիշների մասով:

Միաժամանակ, նույն արձանագրության 3-րդ կետով Հանձնաժողովը որոշել է էլեկտրոնային եղանակով ծանուցել մասնակցին՝ առաջարկելով մինչև 2017թ. հուլիսի 27-ը

Ժամը 16:00-ն ներկայացնել արձանագրված անհամապատասխանությունների շտկումները:

Մասնավորապես, հանձնաժողովն արձանագրել է հետևյալը.

«Մասնագիտական փորձառություն» - ներկայացված փաստաթղթերում նմանատիպ՝ էներգետիկ բնագավառում կատարված աշխատանքների ծավալները չեն համապատասխանում, քանի որ նախկինում կատարված պայմանագիրը (կամ պայմանագրերը) գնահատվում է (կամ գնահատվում են) նմանատիպ, եթե դրա (դրանց) շրջանակներում մատակարարված ապրանքների, մատուցված ծառայությունների և կատարված աշխատանքների ծավալը (կամ հանրագումարային ծավալը)՝ գումարային արտահայտությամբ, պակաս չէ տվյալ գնման ընթացակարգի շրջանակներում մասնակցի ներկայացրած գնային առաջարկի հիսուն տոկոսից, որից առնվազն մեկ պայմանագրի շրջանակներում մատակարարված ապրանքների, մատուցված ծառայությունների և կատարված աշխատանքների ծավալը գումարային արտահայտությամբ, պակաս չէ տվյալ գնման ընթացակարգի շրջանակներում մասնակցի ներկայացրած գնային առաջարկի քսան տոկոսից:

Նույն ընթացակարգի իմաստով նմանատիպ են համարվում էներգետիկ լիցենզիայի շրջանակներում աշխատանքների կատարված լինելը (շինարարական ծրագրերի դեպքում տնտեսական գործունեության նույն խմբերը սահմանվում են հաշվի առնելով քաղաքաշինության բնագավառում լիցենզավորման ենթակա գործունեության տեսակը և ներդիրները):

«Ֆինանսական միջոցներ» չափանիշը չի համապատասխանում հրավերի պահանջներին, քանի որ երեք հաշվետու տարիների համախառն եկամտի հանրագումարը պակաս է ներկայացված գնային առաջարկից:

Հանձնաժողովը 27.07.2017թ. ժամը 16:00-ին կայացած նիստի թիվ 3 արձանագրության 1-ին կետի «ա» ենթակետով որոշել է Ընկերության հայտը մերժել՝ «Մասնագիտական փորձառություն», «Ֆինանսական միջոցներ» չափանիշները չհամապատասխանելու հիմնավորմամբ:

Նույն արձանագրության 2-րդ կետով Հանձնաժողովը որոշել է հաջորդաբար տեղ զբաղեցրած մասնակցին՝ «ԱՐԳՈՀՇԻՆ» ՍՊԸ-ին ներկայացնել որակավորման փաստաթղթեր ներկայացնելու պահանջ:

Պաշտոնական ընթացակարգի քննության նպատակով Խորհրդում կայացած նիստին Պատվիրատուն հայտնել է, որ իր կողմից կայացված որոշման համար հիմք է հանդիսացել այն փաստը, որ Ընկերության հայտով ներկայացված՝ «Ֆինանսական միջոցներ» չափանիշը չի բավարարել հրավերի պահանջներին, քանի որ երեք հաշվետու տարիների համախառն եկամտի հանրագումարը պակաս է եղել գնային առաջարկից, ինչպես նաև «Մասնագիտական փորձառություն» չափանիշի գնահատման համար Ընկերության կողմից նախկինում կատարված նմանատիպ պայմանագրերով՝ էներգետիկ լիցենզիայի շրջանակներում իրականացված աշխատանքների հանրագումարային ծավալը չի համապատասխանել հրավերով նախատեսված պահանջին:

Պատվիրատուի ներկայացուցիչը հայտնել է նաև, որ Ընկերության կողմից ներկայացված՝ նախկինում կատարված երեք պայմանագրերից միայն մեկի՝ Հրազդանի թիվ 2 հիմնական դպրոցի վերանորոգման աշխատանքների գնման պայմանագրի կնքման համար հրավերով սահմանվել է քաղաքաշինության բնագավառում շինարարության իրականացման լիցենզիա՝ ըստ հետևյալ ոլորտների՝ բնակելի, հասարակական, արտադրական, էներգետիկ, հիդրոտեխնիկական, մինչդեռ երկրորդ՝ Քանաքեռավանի միջնակարգ դպրոցի վերանորոգման պայմանագրի, և երրորդ՝ «Երևանի N 8 պոլիկլինիկա» ՓԲԸ-ի բազրիքների պատրաստման և տեղադրման աշխատանքների գնման պայմանագրի կնքման նպատակով հրապարակված հրավերներում էներգետիկ ոլորտի լիցենզիայի առկայության պայման չի նախատեսվել, հետևաբար, այդ աշխատանքները նմանատիպ (համանման) համարվել չեն կարող:

Ընկերության կողմից Ընթացակարգին մասնակցելու նպատակով ներկայացրած հայտի 3 հավելվածով՝ որակավորման չափանիշների պահանջներին բավարարելու մասին հայտարարությամբ, «Աշոտ և Հայկ եղբայրներ» ՍՊԸ-ն հայտարարել և հավաստել է, որ բավարարում է «ԿՄՋՀ-ԳՀԱՇՁԲ-17/3» ծածկագրով գնանշման հարցման հրավերով սահմանված որակավորման չափանիշների պահանջներին և պարտավորվում է առաջին տեղն զբաղեցրած մասնակից ճանաչվելու դեպքում նշված ծածկագրով գնանշման

հարցման հրավերով սահմանված կարգով և ժամկետներում ներկայացնել որակավորումը հիմնավորող՝ հրավերով պահանջվող փաստաթղթերը:

Որպես նախկինում պատշաճ կատարված նմանատիպ պայմանագրեր ընկերությունը հանձնաժողովին է ներկայացրել 02.02.2017թ. կնքված ՀՀ Կոայքի մարզի «Քանաքեռավանի միջնակարգ դպրոց» ՊՈԱԿ-ի շենքի մասնակի վերանորոգման աշխատանքների գնման պայմանագիրը (ծավալը գումարային արտահայտությամբ՝ 7 440 888 ՀՀ դրամ), ինչպես նաև 07.03.2017թ. կնքված «Հրազդանի N2 հիմնական դպրոց» ՊՈԱԿ-ի ճաշարանի վերանորոգման աշխատանքների գնման պայմանագիրը (ծավալը գումարային արտահայտությամբ՝ 4 979 964 ՀՀ դրամ), իսկ Ընթացակարգի շրջանակներում ընկերության կողմից ներկայացված գնային առաջարկը կազմել է 16 150 000 ՀՀ դրամ:

«Գնումների մասին» ՀՀ օրենքի (այսուհետ՝ նաև Օրենք) 6-րդ հոդվածի 3-րդ մասի համաձայն՝ մասնակիցը պետք է բավարարի հրավերով սահմանված որակավորման չափանիշները: Նույն մասի 2-րդ և 4-րդ կետերի համաձայն՝ մասնակիցը պետք է ունենա պայմանագրով նախատեսված պարտավորությունների կատարման համար հրավերով պահանջվող համապատասխանաբար մասնագիտական փորձառություն և ֆինանսական միջոցներ:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (այսուհետ՝ Կարգ) 61-րդ կետի համաձայն՝ մասնակիցների՝ օրենքի 6-րդ հոդվածի 3-րդ մասի 2-րդ կետով նախատեսված՝ «Մասնագիտական փորձառություն» չափանիշը գնահատվում է հետևյալ կարգով՝

1) հրավերով պահանջվում է, որ մասնակիցը հայտով ներկայացնում է հայտարարություն, որ հայտը ներկայացնելու տարվա և դրան նախորդող երեք տարվա ընթացքում պատշաճ ձևով իրականացրել է համանման (նմանատիպ) առնվազն մեկ պայմանագիր: Նախկինում կատարված պայմանագիրը (կամ պայմանագրերը) գնահատվում է (կամ գնահատվում են) նմանատիպ, եթե դրա (դրանց) շրջանակներում մատակարարված ապրանքների, մատուցված ծառայությունների և կատարված աշխատանքների ծավալը (կամ հանրագումարային ծավալը)՝ գումարային արտահայտությամբ, պակաս չէ տվյալ գնման ընթացակարգի շրջանակներում մասնակցի

ներկայացրած գնային առաջարկի հիսուն տոկոսից, որից առնվազն մեկ պայմանագրի շրջանակներում մատակարարված ապրանքների, մատուցված ծառայությունների և կատարված աշխատանքների ծավալը գումարային արտահայտությամբ, պակաս չէ տվյալ գնման ընթացակարգի շրջանակներում մասնակցի ներկայացրած գնային առաջարկի քսան տոկոսից.

2) առաջին տեղն զբաղեցրած մասնակիցը, որպես նույն կետի 1-ին ենթակետով սահմանված որակավորման չափանիշը հիմնավորող փաստաթուղթ, ներկայացնում է նախկինում կատարած պայմանագրի (պայմանագրերի) և դրա հաշիվ-ապրանքագրերի պատճենները, իսկ այդ պայմանագրի (պայմանագրերի) պատշաճ կատարումը գնահատելու համար՝ տվյալ պայմանագրի կողմերի հաստատած՝ պայմանագրի սահմանված ժամկետում կատարումը հավաստող ակտի (հանձնման-ընդունման արձանագրություն և այլն) պատճենը կամ տվյալ պայմանագրի կատարումն ընդունած կողմի գրավոր հավաստումը:

Կարգի 63-րդ կետի համաձայն՝ մասնակիցների՝ օրենքի 6-րդ հոդվածի 3-րդ մասի 4-րդ կետով նախատեսված՝ «Ֆինանսական միջոցներ» չափանիշը գնահատվում է հետևյալ կարգով՝ հրավերով պահանջվում է, որ Հայաստանի Հանրապետության ռեզիդենտ հանդիսացող մասնակիցը, բացառությամբ անհատ ձեռնարկատեր չհանդիսացող ֆիզիկական անձի, հայտով ներկայացնում է հայտարարություն այն մասին, որ իր կողմից հայտը ներկայացվելուն նախորդող՝

ա. երեք հաշվետու տարիների համախառն եկամտի հանրագումարը պակաս չէ ներկայացված գնային առաջարկից,

բ. հաշվետու տարվա ընթացքում պարտավորությունների հաշվեկշռային արժեքը չի գերազանցել ակտիվների հաշվեկշռային արժեքը:

Կարգի 65-րդ կետի համաձայն՝ գործարքները համարվում են համանման (նմանատիպ), եթե դրանք դասվում են հրավերով կամ նախաորակավորման հայտարարությամբ նախատեսված՝ համանման համարվող տնտեսական գործունեության նույն խմբերում: Շինարարական ծրագրերի դեպքում տնտեսական գործունեության նույն խմբերը սահմանվում են հաշվի առնելով քաղաքաշինության բնագավառում լիցենզավորման ենթակա գործունեության տեսակը և ներդիրները: Հրավերով

սահմանված՝ համանման համարվող տնտեսական գործունեության տեսակները տարաբնույթ (երկակի) մեկնաբանելու հնարավորության դեպքում առկա տարբերությունը մեկնաբանվում է հոգուտ մասնակցի:

«ԿՄՋՀ-ԳՀԱՇՁԲ-17/3» ծածկագրով գնանշման հարցման ընթացակարգի հրավերի 1.1 կետի համաձայն՝ նույն հրավերով նախատեսված աշխատանքների կատարման համար պահանջվում է հետևյալ լիցենզիան՝ շինարարության իրականացում, ըստ քաղաքաշինության հետևյալ ոլորտի՝ էներգետիկ:

Հրավերի 2.5 կետի՝

• 1-ին ենթակետի «ա» պարբերության համաձայն՝ «Մասնագիտական փորձառություն» որակավորման չափանիշը սահմանվում և գնահատվում է հետևյալ կարգով՝ մասնակիցը պետք է հայտը ներկայացնելու տարվա և դրան նախորդող երեք տարվա ընթացքում պատշաճ ձևով իրականացրած լինի նմանատիպ առնվազն մեկ պայմանագիր: Նախկինում կատարված պայմանագիրը (կամ պայմանագրերը) գնահատվում է (կամ գնահատվում են) նմանատիպ, եթե դրա (դրանց) շրջանակներում կատարված աշխատանքների ծավալը (կամ հանրագումարային ծավալը)՝ գումարային արտահայտությամբ, պակաս չէ տվյալ նույն ընթացակարգի շրջանակում մասնակցի ներկայացրած գնային առաջարկի հիսուն տոկոսից: Ընդ որում առնվազն մեկ պայմանագրի շրջանակում կատարված աշխատանքների ծավալը գումարային արտահայտությամբ պետք է պակաս չլինի նույն ընթացակարգի շրջանակում մասնակցի ներկայացրած գնային առաջարկի քսան տոկոսից:

Նույն ընթացակարգի իմաստով նմանատիպ են համարվում էներգետիկ լիցենզիայի շրջանակներում աշխատանքների կատարված լինելը (շինարարական ծրագրերի դեպքում տնտեսական գործունեության նույն խմբերը սահմանվում են հաշվի առնելով քաղաքաշինության բնագավառում լիցենզավորման ենթակա գործունեության տեսակը և ներդիրները):

• 3-րդ ենթակետի համաձայն՝ «Ֆինանսական միջոցներ» որակավորման չափանիշը սահմանվում և գնահատվում է հետևյալ կարգով՝ Հայաստանի Հանրապետության ռեզիդենտ հանդիսացող մասնակցի, բացառությամբ անհատ ձեռնարկատեր չհանդիսացող ֆիզիկական անձի, հայտը ներկայացնելուն նախորդող՝

- երեք հաշվետու տարիների համախառն եկամտի հանրագումարը չպետք է պակաս լինի նույն ընթացակարգի շրջանակում մասնակցի ներկայացրած գնային առաջարկից.

- հաշվետու տարվա ընթացքում պարտավորությունների հաշվեկշռային արժեքը չպետք է գերազանցի ակտիվների հաշվեկշռային արժեքը(...):

Որպես Հրավերով նախատեսված «ֆինանսական միջոցներ» չափանիշը հիմնավորող փաստաթղթի շտկված տարբերակ Ընկերությունը ներկայացրել է ՀՀ ԿԱ ՊԵԿ-ի կողմից տրամադրված՝ 2016թ. 4-րդ եռամսյակի ավելացված արժեքի հարկի ճշգրտված հաշվարկը, որի համաձայն Ընկերության ընդամենը շրջանառությունը (համախառն եկամտի ծավալը) հաշվետու ժամանակահատվածում կազմել է 18 880 308 ՀՀ դրամ:

Խորհուրդն արձանագրում է, որ Ընկերության՝ երեք հաշվետու տարիների համախառն եկամտի հանրագումարը պակաս չէ վերջինիս կողմից ներկայացված գնային առաջարկից և նշված որակավորումը համապատասխանում է Հրավերով սահմանված պահանջներին:

Պատվիրատուն նշել է, որ համայնքապետարանի կողմից հայտարարված գնման ընթացակարգով նախատեսվել է լուսավորության ցանցի կառուցման աշխատանքների ձեռքբերում և հրավերով սահմանվել է քաղաքաշինության բնագավառում էներգետիկ ոլորտի շինարարության իրականացման լիցենզիա: Ընկերության կողմից ներկայացվել են նախկինում կատարված երեք պայմանագրեր, մինչդեռ դրանցով նախատեսված աշխատանքներից միայն Հրազդանի թիվ 2 հիմնական դպրոցի վերանորոգման աշխատանքների ձեռքբերման նպատակով հաստատված հրավերով է սահմանվել քաղաքաշինության բնագավառում շինարարության իրականացման լիցենզիա՝ ըստ հետևյալ ոլորտների՝ բնակելի, հասարակական, արտադրական, էներգետիկ, հիդրոտեխնիկական: Մյուս պայմանագրերով՝ համապատասխանաբար Քանաքեռավանի միջնակարգ դպրոցի վերանորոգման և «Երևանի N 8 պոլիկլինիկա» ՓԲԸ-ի բազրիքների պատրաստման և տեղադրման աշխատանքների ձեռքբերման նպատակով հաստատված հրավերներով, էներգետիկ ոլորտի լիցենզիայի առկայության պայման չի նախատեսվել, հետևաբար այդ աշխատանքները նմանատիպ (համանման) համարվել չեն կարող:

Խորհուրդն ուսումնասիրել է Հրազդանի թիվ 2 հիմնական դպրոցի վերանորոգման և Քանաքեռավանի միջնակարգ դպրոցի վերանորոգման աշխատանքների ձեռքբերման

պայմանագրերի ծավալաթերթ-նախահաշիվները, ինչի արդյունքում պարզվել է, որ Քանաքեռավանի միջնակարգ դպրոցի վերանորոգման աշխատանքների պայմանագրի ծավալաթերթ-նախահաշիվում առկա էներգետիկ բնույթի աշխատանքներն ամբողջովին համանման են Հրազդանի թիվ 2 հիմնական դպրոցի վերանորոգման աշխատանքների պայմանագրի ծավալաթերթ-նախահաշիվում առկա էներգետիկ բնույթի աշխատանքներին, հետևաբար Խորհուրդը գտնում է, որ դրանք հանդիսանում են հրավերով պահանջվող քաղաքաշինության բնագավառում էներգետիկ ոլորտի շինարարության իրականացման լիցենզիայի շրջանակներում կատարված աշխատանքներ:

Ինչ վերաբերում է Պատվիրատուի այն դիտարկմանը, որ Քանաքեռավանի միջնակարգ դպրոցի վերանորոգման աշխատանքների ձեռքբերման նպատակով հաստատված հրավերով չի պահանջվել էներգետիկ ոլորտի լիցենզիա, ուստի նշված պայմանագիրը չի կարող համարվել նմանատիպ, ապա Խորհուրդը համարում է այն անհիմն, քանի որ պատվիրատուի կողմից ընթացակարգի հրավերով լիցենզավորման մասին ՀՀ օրենսդրությամբ լիցենզավորման ենթակա աշխատանքների կատարման համար նախատեսված համապատասխան լիցենզիայի պահանջ չսահմանելը դեռ չի նշանակում, որ նշված աշխատանքները կարող են իրականացվել առանց համապատասխան լիցենզիայի:

Օրենքի 34-րդ հոդվածի՝

- 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

- 2-րդ մասի 1-ին կետի համաձայն՝ առաջին տեղը զբաղեցրած մասնակիցը որոշվում է՝ բավարար գնահատված հայտեր ներկայացրած մասնակիցների թվից՝ նվազագույն գնային առաջարկ ներկայացրած մասնակցին նախապատվություն տալու սկզբունքով:

Այսպիսով, Խորհուրդը գտնում է, որ «ԿՄՋՀ-ԳՀԱՇՁԲ-17/3» ծածկագրով գնանշման հարցման ընթացակարգի հրավերով սահմանված «Մասնագիտական փորձառություն» չափանիշի գնահատման համար Ընկերության կողմից ներկայացված՝ նախկինում կատարված Հրազդանի թիվ 2 հիմնական դպրոցի վերանորոգման և Քանաքեռավանի

միջնակարգ դպրոցի վերանորոգման աշխատանքների ձեռքբերման պայմանագրերը նույն ընթացակարգի իմաստով նմանատիպ են, իսկ ՀՀ ԿԱ ՊԵԿ-ի կողմից տրամադրված՝ ավելացված արժեքի հարկի ճշգրտված հաշվարկով ներկայացված տեղեկատվության համաձայն՝ Ընկերության «Ֆինանսական միջոցներ» չափանիշը համապատասխանում է Հրավերի պահանջներին, ուստի Հանձնաժողովը՝ Ընկերության հայտը անբավարար գնահատելով՝ խախտել է Օրենքի 34-րդ հոդվածի 1-ին մասով, 2-րդ մասի 1-ին կետով, Կարգի 61-րդ, 63-րդ և 65-րդ կետերով սահմանված պահանջները:»:

Հաշվի առնելով վերոգրյալը՝ Խորհուրդը գտնում է, որ «Աշոտ և Հայկ եղբայրներ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր առկա չեն:

Ելնելով վերոգրյալից և ղեկավարվելով «Գնումների մասին» ՀՀ օրենքի 6-րդ հոդվածի 2-րդ մասով, 50-րդ հոդվածի 7-րդ մասի 2-րդ կետով՝ ՀՀ գնումների բողոքարկման խորհուրդը


Ո Ր Ո Շ Ե Ց

ՀՀ ֆինանսների նախարարության կողմից 14.08.2017թ «Աշոտ և Հայկ եղբայրներ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով Խորհրդում նախաձեռնված պաշտոնական ընթացակարգը մերժել:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

**ՀՀ գնումների բողոքարկման
խորհրդի անդամ՝**



ԷՄԻԼ ՍԱՐԳՍՅԱՆ